



partii naleraq

UPA2016/104, 106, 107 & 108

13. april 2016

Uunga siunnersuut: Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqalersillugu ikiuinissaq pillugu Det Internationale Atomenergiagenturimi isumaqatigiissummut Danmarkip akuersinera pillugu inatsisip Kalaallit Nunaanni atuutilersinneqarnissaa pillugu peqqussummut oqaaseqaat pillugu Inatsisartut aalajangiussinissaannut siunnersuut. (UPA2016/104)

Uunga siunnersuut: Tunisassianik marloqiusamik atorineqartartunik avammut annissuineramik nakkutiginnineq pillugu Kalaallit Nunaannut inatsisissatut siunnersuummut oqaaseqaateqarnissaq pillugu Inatsisartut aalajangiiffigisassaat. (UPA2016/106)

Uunga siunnersuut: Atomip nukinganik atortussianik sorsunnerunngitsumut atuineramik nakkutilliineq pillugu Kalaallit Nunaannut inatsit pillugu Siunnersuummut oqaaseqaatissamut Inatsisartut aalajangiussassaat (UPA2016/107)

Uunga siunnersuut: Pinerluuteqarsimasunik tunniussisinnaatitaaneq pillugu inatsisip ilaata allangortinneqarnissaa pillugu inatsisip Kalaallit Nunaanni atuutilersinneqarnissaanik kunngip peqqusutaanut Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaat. (UPA2016/108)

(Inuussutissarsiornermut, Suliffeqarnermut, Niuernermet Nunanullu Allanut Naalakkersuisoq)

Siullermeerneqarnera

Siullermik erseqqissaatigitigu Partii Naleqqami aatsitassanik qinngornernik ulorianartortalinnut naaggaarluinnartuugatta. Taamaattumik uku siunnersuutit itigartilluinnarpagut.

Killormut sulisoqarpoq.

Innuttaasut isumaat tusaqqaanngiivillugit makku piareersaatitut inatsisiliariniarneqartut tupinnarput, ernumalersitsimmatalu tamanna tupinnarpallaanngilaq, sualummik 2009-mi namminersornermi inatsimmi pissaaneq annertoq nunatta inuinit tunniunneqartoq aallartilluarataluunniit mangiarlugu aallartikkatsigu, uagulluunniit Inatsisartut, taakkulu sinnerlugit ataatsimiititaliat inatsisitigut unioqqutitsisoqarnerisooq qulakkeeqqaartinnagu. Qanoruna suleriaaseqarniartugut? Sooruna

ernumanartoqangippat partiit ilaannit innuttaasut taasitikkumaneqangittut? Sooruna aamma Politimesteri ernumalersoq makku siunnersuutit kingunerisinnaasai eqqartorneqartillugit.

Makku aalajangiiffigisassatut siunnersuuterpaaluit ukiaq upernaq mannalugit qallorneqartut, ilaatigut Naalagaaffiit Peqatigiit aalajangersagaanik toqqammaveqartut, uppersiinnarpaat aatsitassaq naliginnaangilluinnartoq eqqartorneqalersoq. Taamaattumik eqqaaqqillarput killormut tulleriaarineq ingerlallugu maani sulivugut, tupinnaangilarlu innuttaasut ernumaneruleriartuinnarmata.

Taamaattumik manna uteqqillarput, atali innuttaasut paasissutissanik tuniorariarlugit, isumaqataanersut akerliunersulluunniit taasiteqqaartigit, taava inerniliussaqtunngavigalugu aalajangersaasoqassappat aalajangersaaqqissaqqaarpugut, kikkut tamat oqartussaaqataanerat ataqqillugu. Tassami innuttaasut sullippagut nunatta avataaniit iluanaarniapiluttut aqutissiuuttussaangilugut, kingunissaa inuttaanut, uumasuinut nunaannullu eqqarsaatiginnigilluinnarlu. Innuttaasut toqqissillutik nammineq nunaminni inuusinnaanissaat qulakkeerniartussaavarput – tassa pisussaaffitta pingaarnarpaata.

- Assersuutigilarput Maarmorilimmi aatsitassarsioreernerup kingorna ukiorpassuarni aqerlumik mingutitsineq pissutigalugu qalerualinnik immallu uumasuinik allanik Maarmorillip eqqaani pisanik nereqqusinnigilluinnarsimaneq, uanilu aatsitassaq sulilorianarnipilussuaq eqqartorniarnearpoq.
- Immamik inuussutissarsiortuuvugut, massakkumi 90% sinnerlugu nunatta avataanut tunisartakkatta imartatsinni pisuussutitsinneersuupput, qinngonerullu uloriarnartumik mingutitsinerup kingunerisussaavaa ukiumi tusintilikkaani amerlasuuni tunisisinnaajunnaarsinnaanerput.
- Batterikut (ass. Qaarmartartup orussai) maangaannaq inginneqanginnissaanik sakkortuumik peqquneqartannuarluta una sulilorianarneq akueritinniarsarineqarpoq
- Kujataa annertuumik immitsinnut neqissaqarniarnikkut pilersornermut tunngaviliivoq, tassuuna aamma qulakkeerparput nerisatta peqqinnartuunera, akukinnerpaajunera, kapoorneqarsimangittuunera, qinngornermilli ulorianartortalimmik Kuannersuarni aatsitassarsiortoqalissangaluarpat taqqavani nuna mingutsillugu uumasuuteqarsinnaanermut atorsinnaajunnaartinneqarsinnaanera qanittuaranngoriaannaavoq, sulituseriaammik Maarmorilimmi mingutitsinermit sivilunerujussuunnarani annertunerujussuusussaavoq.
- Aatsitassarsiornermi inatsisit taama isikkoqarallartillugu inuiaqatigiit pisuussutiminnik uumatsunik iluanaarsinnaanerat annikitsuararsuuvoq, taamaattumik massakkut piffissaq atorluarlugu qulakkeertigu pisuussutitsinnit iluanaarnissarput. Unalu aamma eqqaalarput, misissueqqaarnissami akuersissutini allani 90-t missaani sinnerusuni aammalu qalluinissamut akuersissutini 10-t sinneqartuni isumaqatigiilluta aatsitassarsiorneq ineriartortissinnaagatsigu.
- Taamaakkaluartoq nunarsuarmioqataanitsinni immikkut periarfissatsialaannerusoq tassaavoq imermik minguitsumik tunisassiorsinnaagatta. Qanittukkummi Naalagaaffiit Peqatigiit nalunaarput nunarsuarmioqatigut 770 miliuunit sinnerlugit massakkorpiaq imermik imeriaannarmik pisariaqaritsilluinnartut masakkorpiaq, aqaguunngitsoq, unnuguunngitsoq,

massakkulli. Inuiaqatigiit iluanaarsinnaanerat inatsisitigut qulakkeeriarlugu, tamakku aallunnerulernissaat uagut Partii Naleqqamiit orniginartinnerujussuarput, tunisassiarineqarnerami allanik sanilluinneqarsinnaanngitsumik mingummik ulorianartumik pilersitsinaviangilaq. Pisuussut taanna naassaanngiusattumik annertussusilik pigaarput, inatsisitigut inuiattut iluanaarnissarput qulakkeerluariarlugu tunisassiarilerniartigu.

Taamaattumik aallartikkatta oqariartuuterput uteqqillarput – uku siunnersuutit Partii Naleqqamiit itigartilluinnarpagut, tunuarteriarlugillu innuttaasut ataqqinerullugit tusarniariarlugit sulineq ingerlanniartigu.

Qujanaq